

## ჩემპიონატი

### თბილისის “დინამოს” ბრწყინვალე გამარჯვება

6 სექტემბერს ლ. პ. ბერიას სახელობის სტადიონზე ჩატარდა **კიევისა და თბილისის “დინამოს”** სანიმუშო გუნდების კალენდარული მატჩი ფეხბურთში.

თამაში თბილისის დინამოელთა მწყობრი იერიშებით იწყება, სტუმართა კარის წინ ხშირია კრიტიკული მომენტები, მაგრამ უშედეგო – ძლიერად დარტყმული ბურთი მიზანს ვერ ხვდება. მე-10 წუთზე ხელსაყრელი მომენტით სარგებლობს პაიჭაძე, უსხლტება დამცველთა მარჯვენა ფრთას და ანგარიშიც იხსნება – 1:0.

კიეველთა ცდა გაეთანაბრებინათ ანგარიში მიზანს ვერ აღწევს. მათი ნახევარდამცველთა სამეული, რომელსაც მთავარი როლი უნდა ეთამაშა ამ საპასუხისმგებლო მატჩში მთლიანად მოწყვეტილი აღმოჩნდა თავდამსხმელებისაგან. მე-15 წუთზე სტუმართა კარის ბადეში მე-2 ბურთი ეხვევა, ხოლო მე-10 წუთზე ამავე კარში პაიჭაძის მიერ ოსტატურად გატანილი ბურთი მაყურებელთა ერთსულოვან ტაშს იწვევს.

ტაიმი მთავრდება თბილისელთა სასარგებლოდ – 3:0.

შეჯიბრების მეორე ნახევარში ისტორია მეორდება. სტუმრები ვერ ერკვევიან თბილისელთა თამაშის ტაქტიკაში და დაბნეულობას ამჟღავნებენ. ტაიმის დამთავრებამდის თბილისელებმა (პაიჭაძე, ხარბედია, ჯეჯელავა) შესძლეს 3 ბურთის, ხოლო სტუმრებმა ერთადერთი ბურთის გატანა.

მატჩი დამთავრდა თბილისის “დინამოს” ბრწყინვალე გამარჯვებით – 6:1.

„ახალგაზრდა კომუნისტი“, 7 სექტემბერი, 1940 წ.